

**AGRUPACIÓN EUROPEA DE COOPERACIÓN
TERRITORIAL DO RÍO MIÑO-AECT RÍO MIÑO**



**PLAN DE ACTIVIDADES E
ORZAMENTO PARA
O ANO 2018**


1. MARCO


A Agrupación Europea de Cooperación Territorial do Río Miño, en adiante **AECT Río Miño**, é unha persoa xurídica de dereito público, constituída pola Comunidade Intermunicipal do Alto Minho e pola Deputación Provincial de Pontevedra, co obxectivo de promover a cooperación territorial transfronteiriza.

A **AECT Río Miño** foi constituída ao abeiro do Regulamento (CE) núm. 1082/2006, do Parlamento Europeo e do Consello, de 5 de xullo de 2006, modificado polo Regulamento (UE) núm. 1302/2013, do Parlamento Europeo e do Consello, de 17 de decembro de 2013, a través dunha escritura pública asinada o 24 de febreiro deste ano, acto que foi publicado na 2.^a serie do *Diário da República Portuguesa* do 8 de marzo e rexistrado no Comité das Rexións europeo.



O territorio de intervención da **AECT Río Miño** abrangue 10 concellos que forman parte da **CIM Alto Minho**: Arcos de Valdevez, Caminha, Melgaço, Monção, Paredes de Coura, Ponte da Barca, Ponte de Lima, Valença, Viana do Castelo e Vila Nova de Cerveira; e 16 concellos que integran a **Deputación Provincial de Pontevedra**: Arbo, A Cañiza, Covelo, Crecente, A Guarda, As Neves, Mondariz, Mondariz-Balneario, Oia, Pontearreas, O Porriño, O Rosal, Salceda de Caselas, Salvaterra de Miño, Tomiño e Tui.





A **AECT Río Miño**, co obxectivo de contribuír ao desenvolvemento e reforzar a cohesión económica e social do seu territorio, ten como atribucións articular o espazo común e promover as relacións de cooperación territorial, aumentar a cohesión institucional do territorio de intervención, promover o patrimonio cultural e natural transfronteirizo, promover o espazo da AECT Río Miño no exterior para valorizar as potencialidades dos recursos endóxeos e tamén crear e consolidar a marca turística transfronteiriza Río Miño e outras marcas no ámbito nacional e internacional.

Para alcanzar os seus obxectivos e continuar a súa misión, a **AECT Río Miño** deberá, por un lado, capitalizar toda a experiencia e o coñecemento provenientes das dinámicas de cooperación transfronteiriza anteriormente desenvolvidas na fronteira do río Miño, entre as que destaca a Uniminho-Asociación do Val do Miño Transfronteirizo, e, por outro lado, a través da súa consolidación como un instrumento estable de articulación institucional e territorial, potenciar o papel da cooperación transfronteiriza no desenvolvemento do territorio do río Miño transfronteirizo.

Neste ámbito débese destacar o exercicio de coordinación que realizou desde febreiro de 2017 o Grupo de Traballo AECT Río Miño, constituído pola CIM Alto Miño, a Deputación de

Pontevedra e Uniminho, que creou as condicións necesarias para o arranque formal da AECT Río Miño.



De acordo con estes principios, o Plan de actividades e orzamento 2018 da AECT Río Miño concentrará unha gran parte dos seus recursos en actividades para a súa consolidación institucional na rexión e para o desenvolvemento territorial do río Miño transfronteirizo, tanto desde o punto de vista interno, por medio da sedimentación do traballo en rede coas dinámicas locais de cooperación transfronteiriza (A Guarda-Caminha-O Rosal, Vila Nova de Cerveira-Tomiño, Valença-Tui, Monção-Salvaterra-As Neves e Melgaço-Arbo-Crecente) e do apoio á implementación do proxecto "SmartMiño", cofinanciado polo Interreg V-A (especialmente o proceso de planificación estratéxica en curso), como do punto de vista externo, a través da presentación da AECT Río Miño a entidades rexionais, nacionais e europeas, e no seguimento dos proxectos trasladados da Uniminho cuxas competencias legais non pertencen á Administración local (co enfoque en compartir servizos de saúde e de transporte). Tamén destaca o apoio regular que, no ámbito do protocolo que se realizará coa Cámara Municipal de Vila Nova de Cerveira, se lle dará ao proxecto "Amizade Cerveira-Tomiño".

Tamén haberá un esforzo moi significativo na promoción de actividades que contribúan a conservar e valorizar o río Miño transfronteirizo (en particular a estruturación da marca Río Miño), especialmente no apoio á CIM Alto Miño e á Deputación de Pontevedra na coordinación e implementación do proxecto "Visit_Rio_Minho", aprobado polo programa Interreg V-A, na identificación e inserción en redes e colaboracións nacionais e internacionais que sosteñan a estratexia do río Miño transfronteirizo e tamén na busca de fontes de financiamento nacionais e

comunitarias e a adhesión a posibles candidaturas.


Os recursos financeiros distribuiranse segundo o cumprimento dos obxectivos e metas fixados nestes documentos, pois o proceso de elaboración do Plan de actividades e orzamento tivo como base a busca de solucións que permitan a optimización de recursos, especialmente a mobilización de recursos humanos e técnicos das entidades asociadas, que serán fundamentais para o arranque e desenvolvemento dos primeiros seis meses de actividade da **AECT Río Miño**.

2. ACTIVIDADES MÁIS RELEVANTES

De acordo co marco do punto anterior, a proposta de Plan de actividades e orzamento para 2018 ten como base a implementación das seguintes actividades máis relevantes, que contribúen a conseguir a misión da AECT Río Miño:

I. Actividades de consolidación institucional e desenvolvemento territorial do río Miño transfronteirizo

1.1. Consolidación institucional da AECT Río Miño

A large, stylized handwritten signature in blue ink is written over the first paragraph of this section.

Constituída en febreiro de 2018, a AECT Río Miño deberá promover neste exercicio un conxunto de actividades que teñan como fin a súa posta en marcha funcional e a consolidación na rexión. En canto a esta cuestión, en 2018 preténdese crear as condicións de xestión financeira e de procedementos xurídicos necesarias para o bo funcionamento da AECT Río Miño, especialmente ao nivel da articulación de recursos humanos e técnicos da CIM Alto Minho e da Deputación de Pontevedra, responsables da implementación dos proxectos aprobados no ámbito do programa Interreg V-A. Por outro lado, tamén será un ano de transición dalgunhas das responsabilidades de xestión e seguimento de proxectos e expedientes asumidos ata agora pola Uniminho.

En canto á consolidación institucional na rexión, o foco inicial estará na relación coas

dinámicas bilaterais de cooperación transfronteiriza no río Miño (Vila Nova de Cerveira-Tomiño, Valença-Tui, A Guarda-O Rosal-Caminha, Monção-Salvaterra de Miño-As Neves, Melgaço-Arbo), paralelamente á constitución e dinamización do Consello Consultivo, de acordo co artigo 9 dos Estatutos, que implicará no proxecto da AECT Río Miño un conxunto de entidades rexionais e nacionais, o que permitirá transmitir con máis eficiencia a súa misión e promover os seus proxectos e actividades en articulación coa CIM Alto Minho e a Deputación de Pontevedra.

Tamén en 2018 a AECT Río Miño buscará establecer e consolidar colaboracións con diversas entidades rexionais, nacionais e europeas, tanto inseridas en proxectos aprobados e en execución ("Visit_Rio_Minho", "SmartMiño") como promovendo outras colaboracións e a participación en redes nacionais e internacionais (por exemplo a Comunidade de Traballo Galicia-Norte de Portugal, a Asociación Europea de Rexións Fronteirizas, outras AECT en actividade), para promover o intercambio de experiencias e boas prácticas e reforzar a capacidade de intervención na Eurorrexión Galicia-Norte de Portugal.

De maneira indicativa, destácanse algunhas entidades identificadas como potenciais socias, especialmente as de ensino superior (IPVC, Escola Superior Gallaecia, FCEER, Universidade do Minho, Universidade de Vigo, Universidade de Santiago de Compostela), da Administración rexional (Xunta de Galicia, CCDR-N), o Aquamuseu do Rio Minho, a Agência Portuguesa do Ambiente, o ICNF, a Capitania de Caminha, a Comandancia Naval de Tui, a Confederación Hidrográfica do Miño-Sil, a Dirección Xeral de Costas e Eures Transfronteirizo.





1.2. Implementación do proxecto "SmartMiño"

A candidatura **Estratexia de Cooperación Intelixente do Río Miño Transfronteirizo, SmartMiño**, destinada a promover a planificación estratéxica transfronteiriza, dar apoio á constitución e consolidación da AECT Río Miño e implementar proxectos piloto nas áreas dos transportes, a mobilidade e a cultura, ten como socios a Deputación de Pontevedra (beneficiario principal), a CIM Alto Minho e a Fundación Centro de Estudos Eurorrexionais Galicia-Norte de Portugal (FCEER), foi aprobada polo programa Interreg V-A, cun investimento global de 942.022,47 euros distribuídos pola CIM Alto Minho (265.808,8 euros), pola FCEER (162.443,9 euros), e pola Deputación de Pontevedra (513.769,76 euros), ata o 31 de decembro de 2019.

No segundo semestre de 2018, a AECT Río Miño promoverá a coordinación da implementación do proxecto, especialmente a través da participación no comité técnico deste proxecto, que xunta representación técnica dos 3 socios co obxectivo de articular a planificación das actividades que se realizarán. Tamén coordinará, en conxunto coa CIM Alto Minho e a Deputación de Pontevedra, a reformulación da candidatura, especialmente para que a AECT Río Miño entre como novo beneficiario e pase a asumir a execución dalgunhas accións no exercicio 2019. Pensando xa na planificación da programación para 2019 e a súa conexión coas dinámicas locais bilaterais (Vila Nova de Cerveira-Tomiño, Valença-Tui, A Guarda-O Rosal-Caminha, Monção-Salvaterra de Miño-As Neves, Melgaço-Arbo), a AECT Río Miño promoverá a realización dun foro cultural co obxectivo de articular a implementación das accións piloto culturais previstas neste proxecto.

Tamén en 2018, no ámbito da implementación da actividade 1 (desenvolvemento da Estratexia Transfronteiriza Miño 2020), e no seguimento do traballo iniciado en 2017, apoiará a CIM Alto Minho, a Deputación de Pontevedra e a FCEER na coordinación do proceso de planificación estratéxica en curso para o territorio do río Miño transfronteirizo e na organización dos dous foros de participación que se realizarán en xuño e outubro. Destácase que este traballo procurará cruzar o seu plan de acción tendo xa en conta o novo período de programación de fondos comunitarios 2030, buscando especialmente reforzar o compromiso

asumido na Declaración conxunta Portugal-España, no ámbito do cume realizado en maio de 2017, da posibilidade de crear un grupo de traballo intergubernamental para promover unha estratexia de desenvolvemento integrada dos ríos internacionais entre Portugal e España, especialmente o río Miño.



1.3. Outros proxectos

- No ámbito dos proxectos pioneiros trasladados da Uniminho, a **AECT Río Miño**, en calidade de entidade que lle sucede e tendo en conta a súa relevancia, procurará continuar a súa concreción, aproveitando os traballos realizados na área da saúde e dos transportes, especialmente a Rede de Referenciación en Servizos de Saúde no Val do Miño Transfronterizo (no ámbito dos protocolos asinados polos gobernos de Portugal e España, e posteriormente pola Administración Regional de Saúde do Norte (ARSN) e pola Consellería de Saúde da Xunta de Galicia) e o Plan de Transportes Públicos no Val do Miño Transfronterizo-MOBITRANS. Deste xeito, a **AECT Río Miño** pretende promover colaboracións e reivindicar, respectivamente, a ampliación, independentemente da circunscrición territorial de cada país, da prestación de coidados médicos en determinadas tipoloxías e apoiar servizos piloto transfronterizos de transporte público por estrada.
- No ámbito do protocolo que se realizará coa Cámara Municipal de Vila Nova de Cerveira, a AECT Río Miño apoiará en 2018 a coordinación técnica do proceso da Axenda Estratéxica de Cooperación Transfronteriza Cerveira-Tomiño, na que destaca a participación nas seguintes actividades:

- Participación nas reunións do Comité de Xestión Estratéxica (CXE) e en diversas reunións

de colaboración entre a Cámara Municipal de Vila Nova de Cerveira e o Concello de Tomiño

- O parque transfronteirizo Castelinho-Fortaleza, aprobado polo programa Interreg V-A (Visit_Rio_Minho), no que destaca o proceso do concurso internacional de ideas do proxecto para o paso sobre o río Miño, no ámbito do protocolo entre a Deputación de Pontevedra (promotora do concurso), o Municipio de Vila nova de Cerveira e o Concello de Tomiño.
- Coordinación xeral da candidatura Axenda Estratéxica de Cooperación Transfronteiriza Amizade Cerveira-Tomiño, presentada ao Programa Interreg V-A.

II. Actividades de conservación e valorización do río Miño

2.1. Implementación do proxecto "Visit_Rio_Minho"

A candidatura "Conservación e valorización do río Miño transfronteirizo", Visit_Rio_Minho, dirixida á conservación e valorización do río Miño transfronteirizo como destino ecoturístico de excelencia, elaborada aínda por Uniminho e que ten como socios a CIM Alto Minho (beneficiario principal), a Deputación de Pontevedra, os municipios de Paredes de Coura, Melgaço, Vila Nova de Cerveira, Valença, Monção e Caminha, a Fundación Centro de Estudos Eurorrexionais Galicia-Norte de Portugal, o Centro Tecnolóxico do Mar e a Universidade de Vigo, foi aprobada polo programa Interreg V-A, cun investimento global de 2 millóns de euros, distribuídos polos beneficiarios portugueses (500.000 euros) e polos beneficiarios galegos (1.500.000 euros).

No segundo semestre de 2018, a AECT Río Miño promoverá a coordinación da implementación do proxecto, en asociación coa CIM Alto Minho (como beneficiario principal), especialmente mediante a coordinación e dinamización do grupo de dirección do proxecto, que xunta representantes técnicos dos 11 socios co obxectivo de planificar a implementación das diferentes actividades. Tamén coordinará, en conxunto coa CIM Alto Minho e a

Deputación de Pontevedra, a reformulación da candidatura, sobre todo para que a AECT Río Miño entre como novo beneficiario e asuma a execución no exercicio 2019 dalgunhas accións relacionadas coa actividade 1 (estruturación da marca Río Miño). Para facer esta articulación no posicionamento estratéxico da marca Río Miño, a AECT Río Miño promoverá tamén en 2018 a realización dun procedemento de contratación pública para o *branding* da marca Río Miño e a súa aplicación nos diversos *outputs* previstos no proxecto.

2.2. Outros proxectos

Dentro do ámbito da temática deste proxecto, a AECT Río Miño herdará da Uniminho un conxunto de *outputs* do proxecto "ECOTUR" (Plan de expansión dos corredores verdes, Repositorio Rede Natura 2000, guías ECOTUR, paneis de interpretación, aplicación ECOTUR), que se aproveitarán tendo en conta o seu potencial de aplicabilidade e dentro dunha lóxica de continuidade na persecución dos obxectivos do actual proxecto "Visit_Rio_Minho".



III- Outras actividades

3.1. Participación en candidaturas

Co obxectivo de obter recursos e promover condicións para o desenvolvemento da súa misión e particularmente alimentar as actividades anteriores, en 2018 a AECT Río Miño promoverá ou participará nas seguintes candidaturas:

- Visit Rio Minho Plus: proxecto que ten como obxectivo global continuar a capitalización da

marca Río Miño e cualificar e monitorizar unha rede de vías verdes transfronteirizas, cun investimento global de preto de 3 millóns de euros ata o 31 de decembro de 2021, presentado no ámbito da 2.ª convocatoria do programa Interreg V-A. Os socios son a Deputación de Pontevedra, os municipios de Caminha, Melgaço, Monção, Paredes de Coura, Valença, Vila Nova de Cerveira, a Universidade de Vigo e o centro de Estudos Eurorrexionais Galiza-Norte de Portugal. A AECT Río Miño ten un investimento global previsto de 448.235,62 euros, coparticipado ao 75 % por fondos FEDER, e será responsable da coordinación xeral do proxecto, a implementación das actividades de consolidación da marca Río Miño, da monitorización da rede de vías verdes e da comunicación.

- Red_LaB_Minho: proxecto dirixido a apoiar as dinámicas bilaterais de cooperación transfronteiriza do territorio da AECT Río Miño, cun investimento global de cerca de 431.745 euros, coparticipado ao 75 % por fondos FEDER, presentado ao ámbito da 2.ª convocatoria do programa Interreg V-A. Implementaranse accións de capacitación e promoción do traballo en rede co obxectivo de crear unha plataforma colaborativa entre as dinámicas locais transfronteirizas, especialmente Vila Nova de Cerveira-Tomiño, Valença-Tui, A Guarda-O Rosal-Caminha, Monção-Salvaterra de Miño-As Neves e Melgaço-Arbo.

- Participación na asociación constituída pola CIM Alto Minho, a Deputación de Pontevedra, Global Nature e GasNatural Fenosa para preparar a proposta da candidatura Río Miño para presentar ao tema “gobernanza” do programa LIFE, prevista para o próximo mes de setembro. A proposta pretende capitalizar o Aquamuseu do Río Miño nos aspectos de promoción e divulgación tendo en conta a importancia deste equipamento ou servizo para todo o tramo do río Miño internacional.

- Busca de colaboracións coa posibilidade de adherirse ou integrar candidaturas no ámbito da cooperación territorial europea.

3.2. Outras actividades

A AECT Río Miño desenvolverá todas as accións consideradas convenientes para os seus fins, especialmente a través da estreita colaboración coa CIM Alto Minho, a Deputación de Pontevedra e a Comunidade de Traballo Galicia-Norte de Portugal na realización de actividades relacionadas coa cooperación transfronteiriza.

4. RECURSOS HUMANOS NECESARIOS

Para o arranque do funcionamento da actividade da AECT Río Miño, nesta fase será necesario constituír o Secretariado Técnico (2), de acordo co artigo 20 dos Estatutos, para promover a mobilización e a articulación dos recursos humanos da CIM Alto Minho e da Deputación de Pontevedra implicados na implementación dos proxectos "Visit_Rio_Minho" e "SmartMiño" cofinanciados polo programa Interreg V-A. En canto ao cadro de persoal para 2018 só está previsto ocupar os dous postos de traballo para as secretarias ou secretarios técnicos.

5. RESUMO DO ORZAMENTO

O orzamento de 2018 ascende a un total de 75.800 euros, que corresponden case na súa totalidade a gastos correntes, e para o ano 2018 está prevista unha coparticipación financeira de 30.000 euros, de acordo cos artigos 7 e 8 dos Estatutos, por parte de cada unha das entidades asociadas, a Comunidade Intermunicipal do Alto Minho e a Deputación de Pontevedra.

AECT Río Miño, 3 de maio de 2018

O director

Uxío Benítez Fernández

O vicedirector

João Fernando Brito Nogueira